

戒性文

天地賦性萬物惟人最靈故曰性靈靈者不執惟人知理故曰性理理者不偏世人不明二者動曰性氣不知人性即天地之性人氣即天地之氣天地之性煦拂生養之氣多虐戾消亡之氣少人之動性使氣如猛天之焰如毒藥之發如勁矢利刀之離弦出鞘傷人實多是性爲暴性氣爲殺氣安得不執不偏無傷天地之和也哉吾今爲世人痛言暴性之害不當暴而暴無事激成有事小事激成大事大事決裂而不可營爲事務由此壞矣不可暴而暴大人長者之前言語不遜失尊卑之序亡長幼之禮不顧干名犯義之愆聲譽由此損矣不必暴而暴逆耳

道藏輯要

呂帝文集

充

室集五
八七

者微拂意者小可忍不能忍可容不肯容易燥易怒怒氣傷肝燥火攻心日累月積病根由此伏矣不宜暴而暴病中酒後食飽睡起神魂未復氣魄方安躁怒忽生大傷攝養年壽由此促矣至於賓客在堂友朋在座一言不合一事不宜即頭面火赤口舌雷轟不特失禮失體使座客窺之知無涵養無優容心淺量窄非致遠之材非任重之器生平由此可輕矣抱負由此可測矣富貴者性暴人皆畏之蒙蔽愈多離心不少欲處人十分雖至九分猶不快莫敢諫阻者非傷天理即害陰陽一朝失勢忍爲十分磨稜亦已晚矣貧賤者性暴人皆棄之傲肆難容狂悖寡合遇機緣十分雖到九分終不就莫肯援引者非困饑寒

必遭顛沛百事無成思求十分將就亦已晚矣對父母而性暴
雖平日善養不得稱孝子待子孫而性暴雖平日善教不得稱
慈親處手足而性暴雖平日稱相敬相愛不得稱難兄難弟凡
此者皆性暴之害也吾願世人敬聽吾言受益不淺老者火性
猶存少者剛性宜制設或彼此爭持我有性彼亦有性使火逢
火焰必迷天剛遇剛鋒必隕地取禍招災莫非性起小者貲財
損焉大者身命殉焉此害尤爲非細而更宜深戒者也或曰人
無烈性何以爲丈夫夫人無剛腸何以爲男子嗚呼過矣天地賦
性與人剛腸烈性之中亦須不執不偏斯不失天地之性靈斯
不失天地之性理斯不失爲丈夫男子焉耳雖然不執不偏又
不若能忍世間大事業未有不從涵蓄寬容之人成之躁暴褊
急之人敗之者果能忍焉又不止爲丈夫男子吾將稱其爲英
雄豪傑人矣

道藏輯要

呂帝文集

辛

室集五